

LI CWÂRBAU ÈT LI R'NAUD : RIMÈTEUWE À DJOÛ..

À l' mérecopète d'on plope qu'aveut pus d' cinquante ans,
On bia r'lûjant cwârbau s' fieut passer por on maïsse.
Il aveut stî scroter on gros djanausse puwant
Èt fé pêyi sès frêres qui lî d'mandin.n' : « Qui faîs' ? »
I n' pleut d'dja mau d' rèsponde, il a rit'nu l' lèçon
Do r'naud èt di s' tayon, qu'il a appris è scole !
Douviè s' bètch, à tot côp, po l' rosse ou po l' soçon,
C'èst do parèy au minme, il invente on-ôte role.
I n' l'a jamais rovî : l'afront di ç' laïde bièsse là
Pèse su sès ratayons dispû l' tims qu'on-z-è cause ;
Li Justice ? Tè l'as dit ! Lès jujes èt l's-acocats :
Présinte ça come ti vous, c'èst zèls qui faïyenu l' sauce :
« C'è-st-one afaïre qui r'monte, èt qu' on 'nn'a télemint rî
Qui ça n' vaut nin lès pwin.nes dè l' vinu r'mète à l' môde !
Dau pus grand tchèsturlin j'qu'au pus p'tit dès-ovrîs,
Gn-a nuk qui s' présinterè po disfinde veste apôte ! »
C'èst tot ç' qu'on-z-a trové à rèsponde au cwârbau
Qui n'aveut qu'one idéye, c'èst di r'lâver s' famille :
« Dji mè l'zî va mostrer qu' dji n' su nin on mansau ! »
Dins dès payis qu'i-gn-a, dès parèys, gn-a dès mile.
À l' vièspréye, on vî r'naud, aroutiné do cwin
Faît s' tou come tos lès djoûs, po ramasser ç' qui trin.ne ;
Nosse cwârbau l'aporçût, sûremint qu'i crève di fwim :
I lache si gros fromadje, come one ayèsse qui jin.ne !
On fromadje qui tchaît là, foû d'on-aube, come on frût,
Li r'naud, maugré qu' l' a fwim, avise èt s' dimèfiye ;
Li cwârbau , vèyant ça, paute èt fait l' ci què l' sût
Come po l' vlu ratraper, i s'cotape èt i crîye !
L'ôte galafe plonke dissu , èt d'on lan, sins tchiketer,
Do fromadje di Vèrvî, i n' è fait qu'one bouchîye.
Li p'tite grênâde èsplôse ! Plumes èt pwèls dismoûjenés :
Li cwârbau s'a r'vindjî : on lome ça one botcherfiye.
Nosse bole ènn'èst rimplîye di cwârbaus èt di r'nauds ;
Jamaîs i n' s'ètindront, minme s'il ont l'minme coleûr.
À l' longue d'èsse disvoyî, l' disbautchance fait trop mau :
Ti n'as pus rin à piède, ti crîyes « Auwe ! » au maleûr.

Albert Delvaux
janvier 2013

Puwant : fromage du pays de Herve
Tchèsturlin : châtelain
Mansau : pigeon

Dismoûjené : éparpillé
Yèsse divoyî : être en souffrance
Disbautchance : désespoir